



**PERUTUSAN DATUK BANDAR
MESYUARAT MAJLIS BIL. 2 /2020
26 FEBRUARI 2020 (2 REJAB 1441H)**

BISMILLAHIRRAHMANIRRAHIM

Assalamualaikum WBT dan Salam Sejahtera.

1. Alhamdulillah, saya ingin merafakkan kesyukuran ke hadrat Allah SWT di atas segala nikmat kurniaan kesihatan yang diberikan kepada kita semua dan dapat bersama-sama dalam Mesyuarat Penuh Majlis kali ini. Saya juga ingin mengucapkan terima kasih kepada semua Ahli Majlis, Ketua Jabatan, pegawai-pegawai dan warga kerja Majlis yang sentiasa memberikan kerjasama dan komitmen kepada Majlis bagi memastikan program dan aktiviti yang dirancang dapat dilaksanakan dengan sebaiknya.

2. SELANGOR KE ARAH BEBAS PLASTIK

Kerajaan Negeri Selangor amat serius dalam usaha menangani isu pencemaran plastik terutamanya plastik sekali guna yang memberi kesan negatif terhadap alam sekitar, kesihatan awam dan ekonomi negeri.

Jemaah Menteri telah meluluskan Malaysia's Roadmap Towards Zero Single-Use Plastics, 2018-2030 pada 10 Oktober 2018 dan telah dilancarkan oleh Kementerian Tenaga, Sains, Teknologi, Alam Sekitar dan Perubahan Iklim (MESTECC) pada 17 Oktober 2018 bertujuan

menangani masalah alam sekitar khususnya berpunca dari pencemaran dari plastik sekali guna termasuklah beg plastik bagi mewujudkan persekitaran yang bersih dan sihat.

Dasar ini menggariskan perancangan dan usaha kerajaan pusat ke arah sifar plastik sekali guna untuk persekitaran Malaysia yang lebih bersih dan sihat menjelang tahun 2030. Pelaksanaan dasar ini juga selari dengan hasrat Kerajaan Negeri Selangor untuk mengurangkan penggunaan plastik sekali guna seperti beg plastik, polistirena dan straw plastik melalui kempen yang telah dilancarkan.

Kempen "Hari Tanpa Beg Plastik" telah mula dilaksanakan oleh Kerajaan Negeri Selangor seawal Januari 2010 dengan pelaksanaan pada hari terpilih iaitu setiap hari Sabtu. Kempen ini telah ditambah baik dengan pelaksanaan "Hari Tanpa Beg Plastik" selama 7 hari seminggu yang bermula mulai 1 Januari 2017. Kempen ini masih diteruskan di seluruh Negeri Selangor dengan pelaksanaan kutipan caj beg plastik oleh premis-premis perniagaan kepada pengguna beg plastik.

Sebelum ini, caj beg plastik ini dikutip melalui syarikat-syarikat peruncit dan para peniaga dan jumlah kutipan tersebut digunakan untuk menjalankan aktiviti program khidmat masyarakat atau 'CSR' oleh mereka sendiri. Kerajaan Negeri bercadang untuk melaksanakan kutipan caj beg plastik ini melalui Pihak Berkuasa Tempatan (PBT) di seluruh Negeri Selangor. Melalui cara ini, jumlah kutipan caj dapat dipantau dengan lebih baik dan digunakan untuk tujuan pelaksanaan program-program dan aktiviti alam sekitar.

Objektif utama pelaksanaan kutipan caj beg plastik melalui Program Kutipan Caj Beg Plastik Di Negeri Selangor adalah bertujuan :

- i. Mengurangkan penggunaan beg plastik melalui perwujudan premis perniagaan yang tidak lagi membekalkan beg plastik kepada pengguna.
- ii. Meningkatkan kesedaran dan memberi pendidikan terhadap orang awam terhadap bahaya pencemaran bahan plastik serta menjadikan masyarakat lebih bertanggungjawab dalam usaha pemeliharaan dan pemuliharaan alam sekitar.
- iii. Bagi mewujudkan Negeri Selangor yang bersih, sihat dan mesra alam sekitar.

Majlis Mesyuarat Kerajaan Negeri telah meluluskan dasar pelaksanaan Kutipan Caj Beg Plastik Melalui PBT mulai 1 Januari 2020. Jumlah kutipan bagi setiap penggunaan beg plastik oleh peniaga akan diserahkan kepada PBT, seterusnya jumlah kutipan ini akan disalurkan kepada Tabung Amanah di peringkat Negeri Selangor dan Tabung Amanah di PBT masing-masing untuk diselaraskan penggunaannya bagi tujuan alam sekitar.

Majlis Bandaraya Petaling Jaya telah mengedar sebanyak 38,058 notis pemberitahuan kutipan caj beg plastik 0.20 sen dalam kawasan pentadbiran Majlis sejak Disember lalu.

Pengedaran notis ini bertujuan untuk memberitahu kepada pengusaha agar tidak membekalkan beg plastik secara percuma kepada pelanggan. Penggunaan beg plastik secara berleluasa tanpa

kawalan juga menjadi faktor penyumbang utama dalam penjanaaan sampah sisa plastik terutama daripada sektor komersil. Jika situasi dan keadaan ini berpanjangan dan berterusan, tidak mustahil MBPJ akan membelanjakan lebih banyak lagi kos pelupusan sampah berbanding apa yang telah dibelanjakan sejumlah RM8.6 juta pada tahun lalu.

3. JELASKAN CUKAI TAKSIRAN SEBELUM 29 FEBRUARI

Peringatan kepada semua pemunya harta di kawasan pentadbiran Majlis Bandaraya Petaling Jaya (MBPJ) yang masih belum menjelaskan cukai taksiran adalah dinasihatkan supaya berbuat demikian pada atau sebelum 29 Februari 2020 (Sabtu) bagi mengelakkan sebarang bayaran tambahan dikenakan.

MBPJ telah mengeluarkan bil cukai taksiran bagi penggal pertama (Januari - Jun 2020) melalui perkhidmatan pos kepada 273,434 pemegang harta yang melibatkan jumlah cukai semasa dan tunggakan sebanyak RM 189.203 juta.

Sekiranya masih terdapat pemunya harta yang belum menerima bil cukai taksiran, MBPJ menyarankan agar pemunya harta tersebut untuk hadir ke **Jabatan Perbendaharaan** bertempat di **Ibu Pejabat MBPJ, Jalan Yong Shook Lin, Petaling Jaya** bagi mendapatkan salinan, dan seterusnya menjelaskan bayaran di kaunter Pembayaran Utama MBPJ.

Pemegang harta juga boleh mendapatkan salinan bil cukai taksiran di **Pejabat Cawangan MBPJ** di No.19-1, Jalan Pekaka 8/1D, PJU 5, Prestige Kota Damansara, Petaling Jaya atau **Kaunter Bergerak EZ-Pay** yang boleh dilawati di laman portal rasmi Majlis.

4. MAJLIS BANDARAYA PETALING JAYA MEMPERKENALKAN PERKHIDMATAN PERPUSTAKAAN BERGERAK MBPJ @ *PJ LIBRARY ON WHEELS*

Dalam usaha memupuk dan menerapkan budaya membaca, Majlis Bandaraya Petaling Jaya telah memperkenalkan Perpustakaan Bergerak MBPJ atau dikenali sebagai "***PJ Library On Wheels***" kepada komuniti di Petaling Jaya. Kemudahan perkhidmatan perpustakaan ini adalah sejajar dengan pengiktirafan Petaling Jaya sebagai *UNESCO Learning City*.

Perkhidmatan perpustakaan bergerak ini mendapat sambutan yang menggalakkan dari pihak sekolah dan pelajar-pelajar di sekolah. Majlis turut menerima cadangan agar diperluaskan lagi perkhidmatan perpustakaan bergerak ke sekolah-sekolah yang memerlukan di Petaling Jaya.

Perkhidmatan perpustakaan bergerak ini adalah bertujuan untuk menghubungkan perpustakaan dengan para pelajar di sekolah yang terletak di kawasan yang jauh dengan perpustakaan. Selain itu, ia juga menerapkan dan memupuk budaya gemar membaca di kalangan pelajar selain memperkenalkan kemudahan terkini yang terdapat di perpustakaan. Di antara perkhidmatan yang terdapat di *PJ Library On Wheels* adalah seperti berikut:

i. Perkhidmatan Pinjaman

Setiap pelajar akan dikenakan yuran sebanyak RM 1.00 dan boleh meminjam satu (1) buah buku dalam tempoh satu minggu dari tarikh peminjaman.

ii. Perkhidmatan Rujukan

Perpustakaan menyediakan bahan-bahan rujukan seperti ensiklopedia, kamus dan majalah-majalah ilmiah

iii. Perkhidmatan Internet Percuma

Terdapat perkhidmatan internet percuma disediakan kepada para pengunjung *PJ Library On Wheels*.

iv. Perkhidmatan *Augmented Reality* (AR)

Augmented reality (AR) merupakan teknologi terkini yang menggabungkan video dan audio. Kaedah ini menjadikan pembelajaran lebih menarik dan interaktif.

v. Kepelbagaian aktiviti-aktiviti

Selain dari menyediakan perkhidmatan pembelajaran, perpustakaan turut menyediakan aktiviti santai dan ruangan santai untuk para pengunjung membaca.

Sehingga setakat ini, waktu perkhidmatan adalah pada setiap hari Selasa bermula jam 9.00 pagi hingga 2.00 petang dan segala perubahan jadual tertakluk kepada penambahan sekolah. Sekolah Rendah Kebangsaan Damansara Damai 2, dengan jumlah keahlian seramai 220 orang pelajar menjadi sekolah pertama di Petaling Jaya yang dapat menggunakan perkhidmatan *PJ Library On Wheels* ini.

5. KESIHATAN DAN KEBERSIHAN DI PETALING JAYA

Jumlah kes demam denggi bagi tahun 2020 sehingga minggu epid 8 adalah sejumlah **1300 kes** demam denggi yang dilaporkan. Jumlah ini menunjukkan **peningkatan** kes sebanyak **19 peratus** berbanding tempoh yang sama tahun 2019 dengan **1097 kes**. Walaubagaimanapun, jumlah ini merupakan jumlah yang terendah berbanding 2 PBT yang lain di daerah Petaling.

Tiada kes kematian dilaporkan. Lokaliti wabak hotspot yang aktif dilaporkan sehingga minggu epid 8 (22/2/2020) di kawasan pentadbiran Majlis adalah sebanyak 26 lokaliti, manakala hotspot terkini dilaporkan pada minggu epid 9 (24/2/2020) sebanyak 25 lokaliti wabak yang dilaporkan.

6. MBPJ LANCAR VAN BAHARU SKUAD PANTAS

Majlis Bandaraya Petaling Jaya (MBPJ) telah melancarkan sebuah van baharu bagi tujuan kegunaan operasi kecemasan dan bencana serta menambah baik perkhidmatan skuad Pasukan Tindakan Segera (PANTAS).

Van pelbagai guna itu telah diubahsuai ruangnya dalamannya yang boleh memuatkan 5 orang pada satu-satu masa seterusnya boleh digunakan sebagai pejabat bergerak atau mini mesyuarat di lokasi tapak bencana atau kecemasan.

Selain itu van tersebut turut dilengkapi almari penyimpanan pakaian uniform, ruang simpanan dokumen, sistem kamera litar tertutup (CCTV) dan beberapa peralatan kelengkapan asas untuk keperluan statik ketika bencana seperti lampu limpah, kapak, topi keselamatan, stretcher lipat,

gergaji, alat pemadam api dan pelbagai lagi kelengkapan asas yang lain.

Skuad PANTAS merupakan pasukan yang mengendalikan kes kecemasan dan bencana yang ditubuhkan di Pihak Berkuasa Tempatan Negeri Selangor berdasarkan keputusan mesyuarat Majlis Mesyuarat Kerajaan Negeri (MMKN) ke 3/2013).

Penubuhan skuad ini tidak akan mengganggu peranan agensi keselamatan sedia ada seperti pasukan Polis Diraja Malaysia (PDRM) dan Jabatan Bomba dan Penyelamat Malaysia, tetapi skuad ini bertindak sebagai sokongan dalam melaksanakan tindakan bantuan merangkumi aspek logistik, kepakaran dan kebajikan. Antara kes kecemasan dan bencana yang pernah dikendalikan oleh Skuad PANTAS MBPJ adalah banjir kilat, tanah runtuh, ribut, pokok tumbang, kemalangan dan kebakaran.

Jumlah terkini anggota PANTAS MBPJ adalah seramai 19 orang yang terdiri daripada seorang pegawai, seorang inspektor dan 17 orang anggota. Dari segi keupayaan logistik Skuad PANTAS kini mempunyai 2 buah van pelbagai guna, sebuah kenderaan pacuan empat roda, dua buah motorsikal berkapasiti 250 cc selain dua buah motor berkapasiti 150 cc.

Sekian, terima kasih.